

## 2 ქულა ლვოვში

ლვოვი. “დრუჟბას” სტადიონი. 29 ივლისი.

“კარპატი” (ლვოვი) – “დინამო” (თბილისი) 1:3 (0:2).

“კარპატი”: შვინიციკი, კიკოტი, სავვა, პოტოჩნიაკი, ჩორბა, ბროვარსკი (ანდრიუშჩენკო), ფურსოვი, პოკორა, ხიუაკი, შპოდარუნოვი, კომინკევიჩი.

“დინამო”: გოგია, ძოძუაშვილი, კანთელაძე, ხურცილავა, ჭელიძე, ებრალიძე, მ. მაჩაიძე, ასათიანი, გუცაევი (ყიფიანი), გ. ნოღია, წერეთელი (ლ. ნოღია).

მსაჯი: ი. პონომარიოვი (კიშინიოვი).

დუბლიორები – 5:4 “დინამოს” სასარგებლოდ (პენალტებით. ძირითადი დრო – 1:1).

ლვოველ ფეხბურთელებს ძალზე ცუდად აქვთ საქმე საკავშირო ჩემპიონატში. 1 ივლისს როსტოველებთან მოგებული მატჩის შემდეგ (1:0), “კარპატიმ” ზედიზედ 3 შეხვედრა წაავო “შახტიორთან” და „ზარიასთან” გასვლაზე, ხოლო მოსკოვის “დინამოსთან” შინ და ამის შემდეგ გათამაშების ცხრილში იმყოფება იქ, სადაც დაბლა ლიგაში გადასვლის “სუნი” ტრიალებს.

ასეთ ვითარებაში მასპინძლებს საკუთარ მინდორზე ყველაფერი უნდა გაეკეთებინათ თბილისის “დინამოსთან” მატჩში, რათა ეხსნათ თავი ამ არასახარბიელო მდგომარეობიდან და დაძრულიყვნენ ბოლო ადგილებიდან. ჩვენ, ლვოველთა ქომაგებს, იმედს გვაძლევდა ის, რომ წინა მატჩში მოსკოვის “დინამოსთან” კარპატელებმა 3 ბურთი გაიტანეს მოწინააღმდეგის კარში.

მაგრამ ეს ვარაუდი, პირდაპირ ვიტყვით, თავდაყირა დადგა თვით მატჩის მსვლელობაში. ლვოველმა ფეხბურთელებმა, თითქოს, ცდა არ დააკლეს, ყველა ღონეს მიმართეს გამარჯვებისთვის ბრძოლაში და ვერაფერს გახდნენ იმიტომ, რომ თბილისელები მათზე მაღლა იდგნენ წმინდა სპორტული თვალსაზრისით, მაღლა იდგნენ საერთო კლასით, ტექნიკით, ტაქტიკით, სისწრაფით, ფიზიკური მომზადებით. მარტო მონდომებით და ძალთა მობილიზებით მასპინძლები ვერ გაუმკლავდნენ მეტოქეს, ვინაიდან ისიც მობილიზებული იყო ამ დღეს და თამაშით კი უკეთესად თამაშობდა. ტრიბუნებზე მსხდომთაგან არავის ეჭვი არ შეჰპარვია სტუმრების გამარჯვების კანონზომიერებაში.

მატჩის მსვლელობაზე დიდი გავლენა იქონია დასაწყისმა. უკვე მე-2 წუთზე ხიუაკს მიეცა გოლის გატანის რეალური შესაძლებლობა, მან კი ვერ გამოიყენა იგი, ხოლო წუთის მერე წერეთელმა თავისი გარღვევა ზუსტი გადაცემით დაამთავრა კარის წინ, სადაც მინდვრის სიღრმიდან შესული ებრალიძე ადგილზე აღმოჩნდა, შეუცდომლად ითამაშა თავით და გახსნა ანგარიში – 1:0.

მასპინძლებმა დაუყოვნებლივ გააძლიერეს შეტევა, “დინამოს” დაცვა და მეკარე სრული დატვირთვით იბრძოდნენ, მათ კარგად ეხმარებოდნენ ნახევარმცველებიც, კონტრიერის მცირე შესაძლებლობის დროს კი გუნდი სწრაფად გადადიოდა მოპირდაპირე ნახევარზე, თავდამსხმელები დროზე იხსნებოდნენ, არ აყოვნებდნენ ბურთის გადაცემას. ერთ-ერთი ასეთი მანევრის შემდეგ, მე-18 წუთზე, გ. ნოღიამ შეძლო ზუსტი დარტყმის შესრულება, რომლის წინაშე შვინიციკი უძლური აღმოჩნდა.

2:0. ასეთმა ანგარიშმა თბილისელებს საშუალება მისცა ბრძოლა განეგრძოთ მშვიდად, სოლიდურად, თავიანთ ძალებში დაჯერებულად.

ლვოველებმა მდგომარეობის გამოსწორება სცადეს მეორე ტაიმის დასაწყისში, რამდენიმე კარგი შეტევაც განახორციელეს, დინამოელები კი კვლავ კარგი ურთიერთმოქმედებით იგერიებდნენ ამ იერიშებს და თვითონაც ხშირად ქმნიდნენ კრიტიკულ მომენტებს მოწინააღმდეგის კართან.

74-ე წუთზე მატჩის ბედი საბოლოოდ გადაწყდა. მინდორზე გუცაევის ნაცვლად ის-ის იყო გამოვიდა ყიფიანი, მან გადააწოდა ბურთი ებრალიძეს, ეს უკანასკნელი დრიბლინგით გავიდა “კარპატის” საჯარიმო მოედანზე და თავისი რეიდი დაბალ კუთხეში დარტყმით დაამთავრა – 3:0.

მასპინძლებმა მხოლოდ ის შეძლეს, რომ “მშრალი” ანგარიშით დამარცხებას დააღწიეს თავი ანდრიუშჩენკოს მიერ 35 მეტრის მანძილიდან შესრულებული დარტყმის წყალობით. ბურთი მოხვდა ძელს და გაეხვია ბადეში – 1:3.

თბილისის “დინამომ” ამ მატჩში კარგი შთაბეჭდილება დატოვა ლვოველ მაყურებლებზე.

რ. ლეჟევი (ტელეფონით, ჩვენი სპეც. კორ.).

“ლელო”, 31 ივლისი, 1973 წ.